



Stručna služba općinskog vijeća i općinskog načelnika

Broj: 01/1-02-1313/20
Ilijaš, 30.06.2020. godine

PRIJEDLOG

Z A P I S N I K

sa 43. (četrdesettreće) sjednice Općinskog vijeća Ilijaš, održane dana 30.06.2020. godine, sa početkom u 10:00h.

Četrdesettrećom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	-
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	SDP
15	ALAN ŠERAK
16	MARIONETA ILIĆ-JURETA
17	MIRSAD OSMANOVIĆ
	SBB-FAHRUDIN RADONČIĆ
18	AKIF BEŠLIJA
	GS
19	-
	SAMOSTALNI VIJEĆNICI
20	SEMIR DIZDAREVIĆ
21	-
22	MUHAMED HANDŽIĆ
23	ALMIR ŠPIODIĆ
24	MEHO DŽINDO
25	-

Odsutni vijećnici:

1. Vehid Halilović,
2. Edhem Hasanović,
3. Asim Mujić i
4. Besim Gljiva

Prisutni gosti:

1. Radio Ilijaš – Nermina Durić-Kahvedžić

Ostali prisutni:

1. Akif Fazlić - općinski načelnik
2. Meliha Avdibegović – pomoćnik načelnika
3. Merima Osmanović – pomoćnik načelnika
4. Sanja Zagorac-Jozić - pomoćnik načelnika
5. Nizama Mališević - pomoćnik načelnika
6. Ilda Kahriman – sekretar OV-a Ilijaš
7. Aida Čutura–Marić - stručni savjetnik za poslove Općinskog vijeća i općinskog načelnika
8. Enisa Mešetović - stručni saradnik za obrazovanje, pitanje mladih i NVO sektor
9. Dženan Suša – IT administrator
10. Admir Dervišević - viši referent za popunu i mobilizaciju struktura, mjere zaštite i obuku
11. Maida Habibović, zapisničar
12. Amar Muftić - volonter

ALMA OMEROVIĆ – predsjedavajuća

Konstatovala da je prisutno 20 vijećnika, da postoji kvorum za odlučivanje, te otvorila 43. sjednicu OV-a Ilijaš.

Predsjedavajuća OV-a, upoznala je vijećnike da je kolega vijećnik Eldar Šehić istupio iz OV-a Ilijaš, te je mandat u Vijeću dobila gospođa Marioneta Ilić-Jureta. Vijećnica Marioneta Ilić-Jureta je dala svečanu izjavu, te je potpisala svečanu izjavu i time preuzela dužnost vijećnika.

Zatim je predsjedavajuća dala na razmatranje zapisnik sa 42. sjednice OV-a.

Primjedbi na Zapisnik nije bilo, pa je OV-e jednoglasno usvojilo Zapisnik sa 42. sjednice OV-a.

Potom je predsjedavajuća pročitala predloženi dnevni red za 43. sjednicu OV-a Ilijaš i isti dala na razmatranje.

NIZAMA MALIŠEVIĆ - pomoćnik načelnika

Predlagač prihvata primjedbe i sugestije Komisije za statut i propise u pogledu tačke 7. Prijedlog Odluke o dopuni Odluke o građevinskom zemljištu gdje Komisija smatra da je potrebno predmetnu Odluku proslijediti na mišljenje Pravobranilaštvu Kantona Sarajevo, te stoga predlagač povlači predmetnu tačku sa dnevnog reda.

Kada je u pitanju tačka broj 9. Prijedlog Odluke o načinu i uslovima prodaje neizgrađenog građevinskog zemljišta (k.č.br.50/2 "Banovac") želim skrenuti pažnju da se desila tehnička greška prilikom kucanja, tako da u članu 1. stav 4. kada je u pitanju spratnost objekta, prvi pasus smo pisali "prizemni dio", a treba da piše "podrumski dio".
Primjedbi i prijedloga na predloženi dnevni red više nije bilo, pa je OV-e jednoglasno usvojilo sljedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 42. sjednice
3. Prijedlog Izmjena i dopuna Budžeta općine Ilijaš za 2020. godinu
4. Prijedlog Odluka o:
 - a) usvajanju Regulacionog plana "Apartmansko naselje Mrakovo 1" - Ilijaš
 - b) provođenju Regulacionog plana "Apartmansko naselje Mrakovo 1" - Ilijaš
5. Prijedlog Odluke o pristupanju izradi Regulacionog plana "Apartmansko naselje Paljevo" Gornji Malešići
6. Prijedlog Odluke o usvajanju "Lokalnog akcionog plana za djecu Općine Ilijaš za period 2020-2022. godina"
7. Prijedlog Odluke o stavljanju van snage Odluke o pristupanju izradi Izmjena i dopuna Regulacionog plana "Željezara" Ilijaš - izgradnja objekta za izradu lakih metalnih konstrukcija
8. Prijedlog Odluke o načinu i uslovima prodaje neizgrađenog građevinskog zemljišta (k.č.br.50/2 "Banovac")
9. Prijedlog rješenja iz imovinsko-pravne oblasti kojima se utvrđuje javni interes:
 - a) broj:06/1-27-585/20
 - b) broj:06/1-27-795/20
 - c) broj:06/1-27-961/20
 - d) broj:06/1-27-1134/20
 - e) obezbjeđenje zemljišta za potrebe rekonstrukcije i proširenje lokalnog puta na relaciji Ljubnići-Kadarići

AD-1

Vijećnička pitanja i inicijative

ANEL BUMBULOVIĆ - ISPRED KLUBA SDA OPĆINSKOG VIJEĆA ILIJAŠ

Inicijativa sa prijedlogom da se ista usvoji kao zaključak:

Kao uposlenik "Doma zdravlja Ilijaš" i kao predsjednik Zdravstvenog vijeća Ilijaš dužan sam da Vas informišem o problemima koji se nalaze u "Domu zdravlja Ilijaš", o gorućim kadrovskim problemima. Ja ću malo duže obrazlagati ovdje da Vas upoznam sa situacijom. Prvenstveno je problem sa nedostatkom ljekarskog kadra u porodičnoj medicini. U ovoj službi se vodi 12 ljekara, ali na papiru. Trenutno u procesu rada imamo pet ljekara, od kojih je jedan na lokalitetu Podlugovi, jedan doktor medicine radi tri tima sa oko 6.000 zdravstvenih kartona u jednoj smjeni, a to traje od polovine marta, jer je ambulatna u drugoj smjeni zatvorena, kako bi proces rada u centralnom objektu i trijažni punkt mogli funkcionisati. Jedan ljekar se nalazi u ambulanti Srednje, a pored pacijenata koji se pripadaju ambulanti Srednje, pruža usluge za privremeno zatvorene ambulante Kamenica i Gajevi. I u centralnom objektu ostajemo sa tri ljekara od kojih dva ljekara rade u prvoj smjeni, a jedan ljekar radi u drugoj smjeni. Treba napomenuti da se u centralnom objektu pružaju zdravstvene usluge za šest timova porodične medicine. Nadalje od jula mjeseca sedam ljekara je u službi. Tri ljekara su na specijalizaciji, jedan ljekar je raskinuo

radni odnos, a jedan odlazi na godišnji odmor, a zatim u penziju. Sa sedam ljekara u službi mora da se organizuje rad u dvije smjene u centralnom objektu, zatim jedan ljekar u ambulanti u Podlugovima i jedan u ambulanti Srednje, te omogućiti uposlenicima korištenje godišnjih odmora. Kako smo naprijed naveli zbog situacije uzrokovane koronavirusom susrećemo se sa nedostatkom kadra. Od polovine marta u organizacionoj jedinici Ilijaš privremeno su zatvorene ambulate Mrakovo, Kamenica i Gajevi, jedna smjena u ambulanti u Podlugovima. Kako se situacija počela smirivati i službe su počele normalno funkcionisanje, imamo veliki priliv pacijenata, kojima je potrebna usluga ljekara porodične medicine i dijagnostika. Broj porodičnih ljekara nije u mogućnosti pružiti svima usluge blagovremeno, zbog prevelike opterećenosti, te imamo često negodovanje i pritužbe od strane korisnika zdravstvene usluge. Uposlenici koji pružaju trenutno pacijentima usluge su više nego preopterećeni, jer pružaju usluge pacijentima još dva tima, uz usluge svoga tima. Također sa postojećim brojem ljekara nije moguće osigurati rad u dvije smjene, vikendima i praznicima, te ukoliko se pod hitno ne obezbijedi ljekarski kadar za organizacionu jedinicu "Dom zdravlja Ilijaš", moglo bi se reducirati rad vikendom. Pored rada u organizacionoj jedinici "Dom zdravlja Ilijaš", treba napomenuti da se ljekari službe porodične medicine šalju na rad sa migrantima u Migrantski centar Ušivak i Blažuj. S obzirom da je Vlada kantona dala saglasnost za upošljavanje 73 uposlenika JU "Dom zdravlja Kantona Sarajevo", od čega je samo 12 ljekara, treba napomenuti da se većina tih ljekara nalazi već nalazi u radnom odnosu preko projekta Zavoda za zapošljavanje. Treba napomenuti i to da organizaciona jedinica Ilijaš nema niti jednog takvog uposlenika preko Zavoda za zapošljavanje, stoga je hitno rješavanje ovih kadrovskih problema i "Domu zdravlja Ilijaš" je neophodno minimalno tri ljekara.

Drugi problem predstavlja nedostatak ljekara specijaliste pneumofiziologa, od oktobra prošle godine nema specijaliste pulmologa u organizacionoj jedinici Ilijaš, te stoga pacijenti moraju takve usluge da traže u drugim organizacionim jedinicama. S obzirom na ovakvu problematiku, obzirom da je Vlada odobrila samo 12 ljekara na području Kantona Sarajevo, a ja imam informaciju da veliki kadrovski problemi se nalaze i u organizacionim jedinicama Hadžićima, Ilidži i Novi Grad, ja bih predložio da se usvoji jedan zaključak koji će ići Ministarstvu zdravstva Kantona Sarajevo, menadžmentu JU "Dom zdravlja Kantona Sarajeva" i svim političkim klubovima u Skupštini Kantona Sarajevo da se riješe gorući problemi kadra prije svega ljekara u JU Dom zdravlja Kantona Sarajevo.

Molim da se više izjasni o ovom u vidu zaključka.

Zaključak:

Traži se od Ministarstva zdravstva Kantona Sarajevo, menadžmenta JU "Dom zdravlja Kantona Sarajeva", svih političkih klubova u Skupštini Kantona Sarajevo, da pristupe rješavanju gorućih kadrovskih problema u organizacionoj jedinici "Dom zdravlja Ilijaš", gdje je potrebno upošljavanje minimalno tri doktora medicine i jedan specijalista pulmolog.

ALMIR ŠPIODIĆ – nezavisni vijećnik

Za ovu sjednicu sam imao jednu, da tako kažem kamaru pitanja i inicijativa, međutim neke je besmisleno postavljati, zato što nema danas ljudi, koji bi trebali na njih odgovarati.

Evo pitanje za Klub SDA da li stoje iza inicijative koju je pokrenuo vijećnik Halid Dizdarević ili je on to sam osmislio, ili cijeli klub stoji iza te besmislene inicijative. Šta je cilj? Šta je svrha te besmislene inicijative? Sad je meni besmisleno postavljati pitanja, ako nema čovjeka da direktno odgovori. S obzirom da sam ovo doživio da se neko obraća meni na ličnoj osnovi, htio sam i ja da se obratim njemu direktno, bez poturanja pitanja u pismenoj formi. Ipak ću pokušati pitanja koja sam htio uputiti direktno kolegi Dizdareviću, pokušati da kažem suštinu onoga što sam htio reći. Ja cijenim da u Klubu vijećnika SDA ima

čestitih, poštenih i moralnih ljudi, siguran sam da će se ograditi od ove besmislene inicijative. Postavlja se pitanje šta je cilj? Šta je svrha? Jesmo li došli na taj nivo da raspravljamo o nečemu što je potpuno zakonito, a da zatvaramo oči i žmirimo na ono što je potpuno nezakonito, što ima elemenata kršenja zakona i ustava. Ja ne kažem da je ova moja reakcija na ovaj način potpuno opravdana, ali ste mi dali za pravo da ovako reagujem. Da li pokušavate da kroz svoje satelite i medije plasirate priču kako sam ja koristio poziciju vijećnika da bi sebi ostvario neke benefite, koje mi po zakonu ne pripadaju, da mi se uplaćuje penziono i zdravstveno osiguranje. Zaboravljate da u Statutu Općine i u Ustavu Federacije u poglavlju V jasno piše. Član Statuta 53. gdje kaže da vijećnik ima pravo na odgovarajuće penziono i zdravstveno osiguranje, ukoliko to pravo ne ostvaruje po drugom osnovu. Isti ovaj član piše i u Ustavu Federacije u poglavlju V iz kojeg proizilazi o formiranju lokalne samouprave. Ovdje se ne govori o jednom vijećniku, već o svim vijećnicima koji su bili prije nas i koji će biti poslije nas, imaju to zakonsko pravo. Ne znam zašto se to problematizira sada. Kao što rekoh to je zakonsko pravo koje imaju svi vijećnici. Je li se nešto ovdje odnosi lično na mene, ili sam ja jedini vijećnik u ovom vijeću, koji je na birou još od 2008. godine, i nisam iskoristio poziciju vijećnika, nisam iskoristio poziciju politike da zaposlim sebe, svoju porodicu, uže članove svoje porodice. Nisam. Jer nisam poltron, nisam ulizica. O poltronima i ulizicama je najbolje rekao Meša Selimović u jednom svom citatu. I svi oni koji žele da to pročitaju mogu naći na internetu, ja im neću to sada citirati. Citiram sada ovdje: "Nisam dozvolio da mi politika stavi jaram na vrat, zbog posla, ili bilo kojeg drugog mene". Imao sam direktno pitanje za kolegu Dizdarevića, evo pokušavam da preskočim to, i stvarno mi je poremetilo to koncept, šta sam htio da kažem. Htio sam da pitam kolegu Dizdarevića da li je on preuzeo na sebe obavezu da se brine o mom ličnom životu, s obzirom da sam dobijao usmene prijetnje da će se neko početi baviti samnom lično, ako ne postupim onako kako mi neko nalaže. Nisam prihvatio da pređem na tu Vašu stranu iz svojih nekih principa i razloga, ali to Vam ne daje za pravo da se bavite mojim ličnim, privatnim životom i mojom mojom porodicom, šta ja to radim i od čega hranim svoju porodicu. To me iznerviralo. Ne bavim se ni ja ničijim privatnim životom. Ova inicijativa koju je pokrenuo kolega Dizdarević bi imala smisla da je nije pokrenuo on, i još par kolega, koji su imali direktnog i indirektnog dodira sa pojedinim udruženjima, koja se finansiraju iz Budžeta. Znači, bilo ko osim njega i još par kolega. Htio sam da ga pitam je li on preuzeo obavezu na sebe da se počne direktno baviti mojim životom. Pokušavate da imenom i prezimenom Almir Špiodić, da napravite slučaj, da napravite neku aferu, ne znam šta je poenta priče da se postavlja pitanje kojim vijećnicima se uplaćuje penziono i zdravstveno osiguranje i koliko je to na godišnjem nivou za četiri godine, da bi to ispala što veća cifra. Pravo pitanje kolega Dizdarević je trebao postaviti: "Zašto grad Ilijaš nema sportsko igralište, a ima zgradu P+3, tamo gdje su sve zgrade P+1, tamo gdje je park, ali nema igrališta grad. Pravo pitanje kolegi Dizdareviću je bilo: "Zašto se svake godine izdvaja 250-300 hiljada za Kulturno sportski centar i Radio Ilijaš i to je na godišnjem nivou preko milion maraka. Za četiri godine je Budžet Općine Ilijaš bio preko 50 miliona maraka i kolega predsjednik kluba vijećnika nađe da se brine o Budžetu, da pita kome se to isplati 8 hiljada za četiri godine. Zašto? Ovo je mala čaršija i sve se zna i svi nas znaju, i znaju svi ko šta radi, ko od čega živi, i ko koristi poziciju i politiku za lične profite i benefit. Htio sam da ga pitam koliko je kolega Dizdarević profitirao i ko mu je dao besplatno korištenje javne površine, gdje je postavio sportski, gdje je postavljena umjetna trava za rekreaciju. Kolega Dizdarević je naplaćivao gore termine što su se koristili. Neko mu je dao besplatno na korištenje javnu površinu, eto zato što je bio najbolji on, najljepši, ne znam šta su bili kriteriji. Dostavit ću ta pitanja i pismeno, koja mi trebaju da se odgovore u Službi. Tražim da mi se dostave izvještaji o pravdanju sredstava, koja se dobivaju iz Budžeta Općine Ilijaš za Sportsku akademiju Ilijaš, u periodu 2012-2019. godine. Također tražim da mi se

dostave analitičke kartice sa banke i računi.

Pitanja:

1. Ko naplaćuje kiriju za iznajmljeni prostor u domu u Kadarićima? Tražim da mi se dostavi ugovor o zakupu.

Kolika je zakupnina kirije i gdje se troše ta sredstva?

2. U kojoj fazi je izrada projekta za pothodnik u Podlugovima?

Inicijativa koju sam prošle godine pokrenuo i koja je prihvaćena od strane načelnika i općine, a odnosi se na izgradnju pothodnika za pješake ispod pruge u Podlugovima. Na postavljeno pitanje u prošloj godini dobio sam odgovor da je urađeno idejno rješenje i da se nastavlja izrada glavnog projekta i prikupljanje neophodnih saglasnosti. Građane koji su inicijatori i potpisnici peticije za izgradnju pothodnika ispod pruge u Podlugovima zanima me da li se radi na izradi glavnog projekta i prikupljanju neophodnih saglasnosti, i kada mogu očekivati početak radova na realizaciji tog projekta.

3. Do kada predsjednici mjesnih zajednica i članovi savjeta mogu podnijeti ostavku na izabranu funkciju kako bi mogli biti na kandidati listi za općinsko vijeće.

S obzirom na to da je vijeće donijelo odluku da je nespojiva funkcija vijećnika i predsjednika savjeta, kao ni člana savjeta mjesnih zajednica, te da se prethodno mora podnijeti ostavku na funkciju koju obavlja trenutno.

Inicijative:

1. Pokrećem inicijativu ispred grupe građana Mjesne zajednice Gajevi i Dragoradi da se izvrši prokresivanje i čišćenje puta na potezu Vrutci-Gajevi, Gajevi-Dragoradi.

Pomenute dionice puta su uveliko sužene zbog rastinja, drveća i korova, koje je izraslo sa strane puta i sprečava preglednost puta u saobraćaju, što može dovesti do saobraćajne nesreće.

Molim vas da nadležna općinska služba iznađe rješenje za ovaj problem i da se u skorije vrijeme to i riješi.

2. Pokrećem inicijativu da mi se dostave godišnji izvještaji o pravdanju sredstava, koja se dobivaju iz Budžeta Općine Ilijaš za Sportsku akademiju Ilijaš, u periodu 2012-2019. godine.

Također tražim da se uz izvještaj za svaku godinu dostavi analitička kartica s banke.

Tražim od nadležne općinske službe da mi dostavi sporazum između Sportske akademije Ilijaš i Općine Ilijaš o korištenju sportskog terena s umjetnom travom iznad osnovne škole "Hašim Spahić".

FAHIR HASANOVIĆ – vijećnik SDA

Ja imam jednu inicijativu vezanu za prevoz, naslovljena na osiguranje sredstava u Budžetu Općine Ilijaš za 2020. godinu, za subvencioniranje prevoza putnika. U skladu sa članom 6. Poslovnika Općinskog vijeća Ilijaš, u funkciji Općinskog vijećnika podnosim sljedeću inicijativu:

Budući da je Naredba Kriznog štaba FBiH od 19. 03. 2020. godine obustavila prijevoz putnika na svim linijama, odnosno Naredba o prestanku zabrane i početku održavanja javnog linijskog prijevoza putnika od 15. 05. 2020. godine, je propisala poštivanje mjera socijalne distance, prouzrokovala je da linije koje se saobraćaju na relacijama: Dragoradi-Ilijaš, Kamenica-Ilijaš, Popovići-Ilijaš, Bioča-Ilijaš i Misoča-Ilijaš, sa umanjenim intenzitetom, kao i da se "đačke linije" ne saobraćaju na pomenutim relacijama, tražim da

se u Budžetu Općine Ilijaš izdvoje određena sredstva za sufinansiranje troškova održavanja prijevoza u cilju zadovoljenja kvalitetnog prijevoza građana Općine Ilijaš. Na osnovu člana 171. Poslovnika predlažem da se navedena inicijativa pretvori u zaključak, obzirom da se na 43. sjednici usvajaju i Izmjene i dopune Budžeta za 2020. godinu.

Zaključak:

I

Zadužuje se Općinski načelnik da u Budžetu Općine Ilijaš za 2020. godinu osigura sredstva za subvencioniranje prijevoza putnika na registrovanim relacijama: Dragoradi-Ilijaš, Kamenica-Ilijaš, Popovići-Ilijaš, Bioča-Ilijaš i Misoča-Ilijaš.

II

Zadužuje se Općinski načelnik da sa registrovanim prijevoznicima na predmetnim linijama sklopi ugovore o subvencioniranju prijevoza putnika, za period juni do početka školske 2020/2021. godine.

AKIF FAZLIĆ - općinski načelnik

Prihvatam da se inicijativa vijećnika Fahira Hasanovića pretvori u Zaključak.

RASIM ŠEHIĆ – vijećnik SDA

Na tragu ovoga što su kolege rekle, mi znamo da imamo problem u ovim udaljenim mjestima, a po pitanju rastinja koje imamo uz sami pojas ceste. Bilo gdje da krenemo Bioča, Kamenica, Popovići, Gajevi, Dragoradi isto nas tako očekuje. Evo kolega Špiodić se dotakao istog pitanja. Ja sam pripremio vijećničku inicijativu, te u ovakvim prilikama praktikujem da se ista pretoči u zaključak.

Zaključak:

Traži se od Direkcije za puteve Kantona Sarajevo da izda nalog izvođaču za održavanje cesta, da u okviru svoje nadležnosti na području općine Ilijaš izvrši prokres, da se ukloni drveće i sitno rastinje u putnom pojasu, a u cilju ostvarenja bolje preglednosti na putnim pravcima na području naše Općine.

MIRZA BEKTIĆ - vijećnik SDA

Nadovezat ću se kratko na izlaganje kolege Almira Špiodića. Mislim da nije korektno da kolegu Halida Dizdarevića prozivaš, kada kolega Dizdarević nije tu. Kasni zbog opravdanih razloga. Ako imaš neko lično pitanje za Halida, trebao si sačekati sačekati da dođe. Nisam ja neki portparol kolege Halida Dizdarevića, ali nije korektno da se proziva neko ko nije tu.

ALMA OMEROVIĆ - predsjedavajuća

Molim Vas nemojte dobacivati.

ALAN ŠERAK - vijećnik SDP

Poslovnička intervencija: Mi se nalazimo na prvoj tački dnevnog reda vijećnička pitanja i inicijative. Ko je šta rekao, rekao je. Ako imate konkretno pitanje postavite ga, ako imate konkretnu inicijativu podnesite je, a lične priče ostavite poslije vijeća. Stvarno nemam vremena da slušam ove nebuloze.

ALMA OMEROVIĆ - predsjedavajuća

Ja zaista mislim da je ta poslovnička intervencija trebala da bude upućena kad je kolega

Špiodić izlagao, ali da ne bi ispalo, da mi svaki put prekidamo nekoga, u vijećničkim pitanjima i inicijativama daje se prostor. Kolega Mirza postavite pitanje? Šta imate? Ako nisam kolegu Špiodića prekinula, tako neću ni kolegu Bektića. Kolega završi, šta želiš reći?

MIRZA BEKTIĆ - vijećnik SDA

Mi se nismo razumjeli, ja sam tražio intervenciju, ali međutim niste me razumjeli. Nije uredu ovo. Kada kolega Dizdarević bude tu neka ga pita lično. Kolega Špiodiću od kako sam ja u vijeću, otprilike dvije godine, Vi ovu govornicu koristite za samopromociju. Bilo kakve stvari, bilo kakve inicijative, bilo šta ili kako Vi prozivate Klub, nas četrnaest vijećnika.

ALAN ŠERAK - vijećnik SDP

Poslovnička intervencija: Ovo tačka se ne zove vijećnička konstatacija, tačka dnevnog reda se zove vijećnička pitanja i inicijative. Ako imate pitanje postavite ga, ako imate inicijativu pokrenite je. Za te stvari druge, smatram da nema smisla, jer onda odosmo skroz u drugom smjeru.

ALMA OMEROVIĆ - predsjedavajuća

Slažem se kolega Šerak, ali smatram da isto trebamo tretirati sve kolege vijećnike. Bila bi zaista sretna, da ste uputili tu poslovničku intervenciju kad je se obraćao kolega Špiodić. Samo ćemo dozvoliti da kolega Bektić završi. Zamolit ću sve kolege, da poslije Mirzinog obraćanja, cijene ovo što je kolega Šerak kazao, a što i ja podržavam.

MIRZA BEKTIĆ - vijećnik SDA

Samo konstatacija, kolega Halid je imao pravo da traži, kao i svi mi ostali od Službe ili bilo koga, da nam dostave odgovor na neka pitanja ili inicijativu, bez obzira da li se to pitanje ili inicijativa odnosi na vijećnika ili bilo koga drugog. Imamo pravo da tražimo.

ALMIR ŠPIODIĆ – nezavisni vijećnik

Replika.

ALMA OMEROVIĆ - predsjedavajuća

Na vijećnička pitanja i inicijative nema replike.

ADEM ALIĆ – vijećnik SDA

Pitanja:

1. Kada je planirana popravka i nadopuna javne rasvjete na području MZ Mrakovo?
2. Kada je planirana sanacija puta Mrakovo-Povioc i sanacija puta u Halugama?

AKIF BEŠLIJA – vijećnik SBB

Inicijativa:

Pokrećem inicijativu prema nadležnoj općinskoj službi da se u Misoči, u kući Seje Halilovića, napravi spomen soba.

Obrazloženje:

Radi se o tome da je tokom rata ova kuća korištena kao komanda, centra veze i sanitet, te u razgovoru sa građanima Misoče izrazili su želju da se u pomenutoj kući formira jedna spomen soba. Shodno tome, molim nadležnu općinsku službu da iznađe mogućnosti da se ova inicijativa i sprovede.

ŠEHERZADA ĆOSIĆ – vijećnica SDA

Inicijative:

1. Pokrećem inicijativu ka JU Dom zdravlja Kantona Sarajevo da se režim rada Ambulanta Mrakovo vrati na uobičajeni, koji je i bio prije perioda pandemije.

Obrazloženje:

Na taj način će se poboljšati kvalitet života stanovnika MZ Mrakovo i olakšati teškoće sa kojima se svakodnevno susreću.

2. Pokrećem inicijativu ka Centrotans Eurolines Sarajevo, da se red vožnje, tj. autobuske linije na relaciji Ilijaš-Popovići, vrati na uobičajeni, koji je i bio prije perioda pandemije.

Obrazloženje:

Na taj način će se poboljšati kvalitet života stanovnika MZ Mrakovo i olakšati teškoće sa kojima se svakodnevno susreću.

ALMA OMEROVIĆ - predsjedavajuća

Zamoliti ću kolege da formulišu Zaključke, kako bi se o istim mogli izjasniti.

ANEL BUMBULOVIĆ - ISPRED KLUBA SDA OPĆINSKOG VIJEĆA ILIJAŠ

Zaključak I

Traži se od Ministarstva zdravstva Kantona Sarajevo, menadžmenta JU "Dom zdravlja Kantona Sarajeva", svih političkih klubova u Skupštini Kantona Sarajevo, da pristupe rješavanju gorućih kadrovskih problema u organizacionoj jedinici "Doma zdravlja Ilijaš", gdje je potrebno upošljavanje minimalno tri doktora medicine i jedan specijalista pulmolog.

Zaključak jednoglasno usvojen.

FAHIR HASANOVIĆ – vijećnik SDA

Zaključak II

I

Zadužuje se Općinski načelnik da u Budžetu Općine Ilijaš za 2020. godinu osigura sredstva za subvencioniranje prijevoza putnika na registrovanim relacijama: Dragoradi-Ilijaš, Kamenica-Ilijaš, Popovići-Ilijaš, Bioča-Ilijaš i Misoča-Ilijaš.

II

Zadužuje se Općinski načelnik da sa registrovanim prijevoznicima na predmetnim linijama sklopi ugovore o subvencioniranju prijevoza putnika, za period juni do početka školske 2020/2021. godine.

Zaključak jednoglasno usvojen.

RASIM ŠEHIĆ – vijećnik SDA

Zaključak III

Traži se od Direkcije za puteve Kantona Sarajevo da izda nalog izvođaču za održavanje cesta, da u okviru svoje nadležnosti na području općine Ilijaš izvrši prokres, da se ukloni drveće i sitno rastinje u putnom pojasu, a u cilju ostvarenja bolje preglednosti na putnim pravcima na području naše Općine.

Zaključak jednoglasno usvojen.

AD-2

Izveštaj o realizaciji zaključaka sa 42. sjednice

Alma Omerović - predsjedavajuća

Na 42. sjednici OV-a Ilijaš donijeli smo Zaključak o usvajanju i provođenju Regulatornog plana "Lješevo-Željeznička stanica" koji je realizovan.

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o realizaciji zaključaka sa 42. sjednice

AD-3

Prijedlog Izmjena i dopuna Budžeta Općine Ilijaš za 2020. godinu

ALMA OMEROVIĆ- predsjedavajuća

Naglasila je da je predlagatelj uložio amandmane koji su sastavni dio Prijedloga Izmjena i dopuna Budžeta općine Ilijaš za 2020. godinu.

AKIF FAZLIĆ - općinski načelnik

Ovim rebalansom smo u osnovi verificirali, odnosno procijenili stanje pada prihoda u budžetima, generalno po svim nivoima, a ono što je najvažnije kada je u pitanju lokalni nivo, odnosno općine gdje je izražen pad prihoda i on je itekako reflektovan, prije svega, u aprilu i maju kada smo u aprilu imali mjesečni nivo prihoda 420.000,00 KM, u maju 430.000,00 KM, a evo juni je bolji cca 630.000,00 KM. Praktično, neki naš prosjek je cca 1.000.000,00 KM na mjesečnom nivou. Dakle, ovaj rebalans je zasnovan na uključenim aktivnim projekcijama koje smo dobili od Federalnog Zavoda za projektovanje razvoja, gdje su definirani indirektni porezi i generalno porezi i naravno ono što se desilo, a to su rebalansi budžeta Kantona Sarajevo i rebalansi budžeta Federacije BiH. To je jedan aspekt ovog rebalansa, a drugi je da su u njega uključeni sav Program ušteda koje ste vi ovdje dobili i koji je donesen početkom aprila i koji je iznosio cca 500.000,00 KM s tim da smo sada aktuelizirali neke situacije na konkretnim pozicijama tako da se on u osnovi u maksimalom iznosu možda nekih 15.000,00-20.000,00 KM nije implementirao u ovaj rebalans, ali 98% je implementiran u Prijedlog ovog rebalansa. Također, u rebalans su uključene socijalne, zdravstvene i ekonomske mjere koje su proizašle iz ovog stanja Korone i naravno, naš ključni zadatak i ključni cilj je bio kako zadržati sve kapitalne projekte, odnosno ključne kapitalne projekte koje smo definisali i kroz Operativni plan i kroz osnovni Budžet i mislim da smo u tome, u osnovi, uspjeli kroz ovaj prijedlog rebalansa. Na bazi svega ovoga, imate prijedlog od 14.209.000,00 KM, što je za 9% manje od osnovnog Budžeta. Ovdje moram kazati, obzirom da je Budžet naš zajednički, da smo na određen način ambiciozno planirali ovu cifru i ta neka ambicija u odnosu na moj realni pogled jeste da je ovaj Prijedlog rebalansa negdje za blizu 1.000.000,00 KM ambiciozniji nego kada bi ga postavili na precizne realne osnove, ali sve u cilju da zadržimo što veći broj kapitalnih projekata koje ćemo vidjeti do kraja godine kako ih isfinansirati, pa na nekoj osnovi ako to bude i deficitarno finansiranje mislim da je puno važnije da se ti projekti finansiraju.

U strukturi prihoda, porezi su ključni gdje je značajan pad i taj pad proizvodi generalna

ekonomska situacija u Federaciji BiH i ne može se ništa posebno uticati.

Porezni prihodi umjesto 6.116.000,00 KM su 5.072.000,00 ili 17% manje. Također, neporezni prihodi, koji također proizilaze iz ekonomskih aktivnosti, prije svega tu mislim kada su u pitanju rente, uređenja, naknade od šuma, koncesije. Dakle, sve je to nešto na što je uticalo ovo stanje i tu imamo gotovo 1.000.000,00 KM pad, odnosno prijedlog sniženja u prihodovnoj strani ovog rebalansa. U osnovnom Budžetu je bilo 2.939.000,00 KM, a sada j 2.040.000,00 KM, dakle za 31% manje.

Kada su u pitanju tekući transferi - tekući transferi Kantona Sarajevo 653.000,00 KM, a sada 597.000,00 KM ili 9% manje. Ono što se kroz ovaj rebalans značajno poboljšava jesu tekući transferi Federacije BiH. Oni su bili 200.000,00 KM, a sada predlažemo 465.000,00 KM ili 233%. Ova povećanja i ova stavka se očekuje iz rebalansa Budžeta Federacije BiH gdje je predviđeno 30 miliona za općine u Federaciji BiH i ta neka prosječna cifra je 375.000,00 KM po svakoj općini. To je prijedlog općina da se izvrši podjela po prosjeku da sve općine dobiju isti iznos sredstava i 90.000,00 KM za proljetnu sjetvu.

Kapitalni transferi od Kantona Sarajevo - imali smo 2.510.000,00 KM, a sada 2.665.000,00 KM ili 4% više. Dakle, Vlada Kantona Sarajevo je kroz svoje rebalanse uspjela obezbjediti da praktično kapitalni dio Budžeta ostane na nivou. Prije svega, ona ga obezbjeđuje kroz kreditna zaduženja. Nama izvor finansiranja nije bitan, bitno je da se obezbjeđuju sredstva za realizaciju naših projekata.

Kada su u pitanju kapitalni primici, tu imamo najznačajniji pad, i moram kazati, pomalo nerealna cifra za prihodovnu stranu budžeta. U osnovnom Budžetu smo imali 1.000.000,00 KM za prodaju zemljišta, u rebalansu je 600.000,00 KM i vjerovatno nećemo uspjeti ni taj nivo obezbjediti. Dakle, to je za 40% manje i ona stabilizirajuća pozicija kada je u pitanju naš Budžet su prenesena sredstva. Dakle, u osnovnom Budžetu je to bilo 2.060.000,00 KM, u ovom rebalansu je 2.583.000,00 KM ili 25% više. Dakle, kroz konačan obračun za prošlu godinu utvrđena je ova cifra i daje stabilizirajući nivo Budžeta i generalno obezbjeđenje realizacije projekata.

Kada je u pitanju rashodovna strana, za velike stavke ja ću samo kazati, a vi možete iz analitike postavljati pitanja da ne prelazim sve pojedinačno. Bruto plate i naknade su smanjene za 5%, odnosno plate su ostale iste, ali su naknade uposlenicima smanjene za 5% i to se odnosi na regres i na određene vrste naknada. Izdaci za materijal i usluge su takođe smanjene za 10,5% odnosno cca 120.000,00 KM. Dakle, po svim tim nekim izdacima koje smo mogli smanjiti, smanjili smo. Tekući transferi, takođe velika pozicija 2.690.000,00 KM, u izmjenama i dopunama 2.768.000,00 KM što je 3% više, ali unutar te strukture imamo gdje smo značajno smanjivali i imamo negdje gdje smo značajno povećavali. Povećavali smo na zdravstvu, socijalnim i ekonomskim mjerama. Transferi drugim nivoima vlasti smanjeni su sa 491.000,00 KM na 463.000,00 KM. Transferi pojedincima sa 1.134.000,00 KM na 1.043.000,00 KM što je za 90.000,00 KM manje ili 8%, ali u okviru te pozicije za socijalne programe povećali smo sa 30.000,00 KM na 70.000,00 KM i ove jednokratne novčane pomoći sa 30.000,00 KM na 42.000,00 KM. Dakle, ovdje imamo dodatnih 52.000,00 KM za socijalne programe. Smanjeno je za prevoz učenika i studenata obzirom da tog prevoza nije bilo u ova 2,5 mjeseca sa 292.000,00 KM, a sada 225.000,00 KM. Kada su u pitanju neprofitne organizacije imali smo značajno smanjenje sa 683.000,00 KM na 586.000,00 KM. U strukturi te stavke imamo UNDP 20.000,00 KM, a sada je 90.000,00 KM i želim kazati da je u okviru ovih 90.000,00 KM nabavka sanitetskog vozila za Dom zdravlja Ilijaš. Pokrenuli smo proceduru sa UNDP-om, a izvori će biti dijelom i UNDP i neke općine grada Sarajeva i naša općina. Političke partije sa 78.000,00 KM na 58.500,00 KM što je 25% manje, ratna udruženja sa 159.000,00 KM na 100.000,00 KM što je 27% manje, sportska udruženja sa 182.000,00 KM na 138.000,00 KM što je 24% manje, kulturna udruženja 37.500,00 KM na 28.150,00

KM, aplikacija programa koji idu direktno na odobravanje načelniku 80.000,00 KM, a sada 45.000,00 KM ili 44% manje. Imamo poziciju subvencija koja podrazumjeva ekonomske mjere gdje smo za 300.000,00 KM povećali stavku iz osnovnog Budžeta sa 347.000,00 KM na 647.000,00 KM ili za 86% više gdje su jedna od ekonomski mjera plaćanje dijela minimalnih plata i dijela minimalnih plata za fizička registrovana lica na području općine Ilijaš za mjesec april i maj 150.000,00 KM. Taj javni poziv je u toku i po projekcijama ove plate bi trebalo dobiti cca 182 radnika. Sljedeća ekonomska mjera je vezana za poljoprivredu, u osnovnom Budžetu 270.000,00 KM, a sada 370.000,00 KM. Ovdje uključujemo program proljetne sjetve čija je realizacija sada krenula. Treća ekonomska mjera je subvencioniranje, odnosno regresiranje kamata - u osnovnom Budžetu je bilo 50.000,00 KM, a sada je 100.000,00 KM. Mislim da je toku javni poziv prema bankama i možda je već završio i ostaje izbor banaka i time privredni subjekti dolaze u poziciju da se obraćaju za kredite svih vrsta u smislu održivosti svog poslovanja ili eventualnog investiranja gdje će dobiti te kredite sa 0% kamata. Kapitalni projekti 5.089.000,00 KM, a sada 4.872.000,00 KM što je 4% manje, kapitalni izdaci 4.242.000,00 KM, a u rebalansu 3.163.000,00 KM što je gotovo milion manje ili 25%, odnosno ukupno kapitalni transferi i kapitalni izdaci koji znače finansiranje ovih svih projekata u osnovnom Budžetu su bili 9.331.000,00 KM, a u rebalansu 8.045.000,00 KM što je cca 1.300.000,00 KM manje ili 14% u odnosu na osnovni Budžet. Budžetsku rezervu smo povećali sa 50.000,00 KM na 88.500,00 KM zbog toga što ne znamo kako će se ovo stanje razvijati kada je u pitanju Korona virus i da li će trebati provoditi neke dodatne mjere koje sada nismo kroz ovaj rebalans posebno pozicionirali.

Kada su u pitanju kapitalni projekti ovdje odmah želim kazati da ovo smanjenje kroz Budžet mi smo uspjeli najvećim dijelom nadomiriti kroz sporazume koje smo potpisali sa Vladom Kantona Sarajevo, a najznačajniji je sporazum vezan za rekonstrukciju saobraćajne infrastrukture gdje smo preko Ministarstva saobraćaja i Direkcije za ceste obezbjedili 750.000,00 KM i taj sporazum u najvećoj mjeri pokriva ovaj nedostajući dio sredstava vezan za naš Budžet i time omogućavamo da najveći dio projekata iz te sfere i zadržimo.

Kada je u pitanju analitika, pitam vas da li želite da vam obrazložim po projektima, školski, vjerski, kulturni i sve ove projekte ili želite da vam odgovorim kroz pitanja da vam sada ne oduzimam vrijeme?

ALMA OMEROVIĆ - predsjedavajuća

Konstatovala je da ne nema potrebe da se pojedinačno obrazlažu projekti.

AKIF FAZLIĆ - općinski načelnik

Sagledali ste sigurno šta je najvažnija struktura tako da se kroz diskusije može odgovoriti na pitanja. Ovdje je bio amandman koji ste dobili i koji glasi:

U okviru člana 3. Izmjene i dopune Budžeta općine Ilijaš za 2020. godinu povećava se budžetska pozicija ekonomski kod 615311 - škole - objekti i oprema, umjesto 837.000,00 KM, treba da stoji 841.500,00 KM.

Smanjuje se budžetska pozicija, budžetska rezerva za 4.500,00 KM.

Navedene izmjene repliciraju se po subanalitičkim kontima u okviru člana 2., 3. i 5.

U okviru člana 4. - Plan razvojnih kapitalnih programa u okviru "12.KAPITALNI TRANSFER ZA ŠKOLSTVO - 615311" dodaje se novi program "Osnovna škola Srednje - projektno tehnička dokumentacija" u iznosu od 4.500,00 KM, sa izvorom

finansiranja "budžet općine".

Takođe imamo prijedlog Zaključka da se subvencionira prevoz u vrijeme školskog raspusta, praktično juni, juli i avgust kad neke linije ne funkcionišu i generalno kada je problematika pokretanja tih linija s aspekta tehnološke, ekonomske i druge situacije i ja taj prijedlog prihvatam. Pročitat ću kako ga definisati.

U članu 3. Izmjena i dopuna Budžeta općine Ilijaš za 2020. godinu uvodi se nova budžetska pozicija koja glasi: "ekonomski kod 61428 subvencija javnim transportnim preduzećima funkcionalni kod 451 u iznosu od 20.000,00 KM i nemam šta drugo, nego smanjiti budžetsku rezervu za 20.000,00 KM tako da će ona iznositi 68.000,00 KM.

Uz ova dva amandmana i Prijedlog koji imate očekujem da podržite ovaj Prijedlog Izmjena i dopuna Budžeta Općine Ilijaš za 2020. godinu, a vjerovatno će se na jesen procijeniti donošenje još jednog rebalansa, ali mislim da ovaj rebalans zaista omogućava sve ove aktivnosti i neophodne mjere kada je u pitanju Korona virus i realizacija projekata koje smo definirali našim Operativnim planom.

MIRSAD OSMANOVIĆ - vijećnik SDP-a

Načelnik je odgovorio i izgleda da se SDA dobro pripremila. Odgovorio mi je na jedno pitanje kako će riješiti ovaj Zaključak i zadovoljan sam, jer nekako mi je čudno bilo da je prihvatio Zaključak, a mi danas imamo rebalans. Znači to je ranije iskoordinirano. Postavit ću dva pitanja. Prvo, načelnik je preskočio jednu značajnu stavku gdje smo imali pad, a radi se o koncesionim naknadama. Znači, ogroman pad i koji je to razlog. Drugo pitanje, ne vidim ovdje nigdje, ako nije federalni grant među ovih 30.000.000,00 KM, planirani dio sredstava od MMF-a.

MUHAMED HANDŽIĆ - samostalni vijećnik

Koristim priliku da građanima Ilijaša čestitam na disciplinovanom ponašanju o toku ove pandemije i bitno je napomenuti da u ovo vrijeme samo četiri naša građanina su bili zaraženi Korona virusom i vjerovatno su to neki koji su bili "vani" i donijeli taj virus, a i oni su bili disciplinovani i ponašali se u skladu sa normama i pravilima koja su postavljena u našoj općini.

Što se tiče Prijedloga Izmjena i dopuna Budžeta općine Ilijaš za 2020. godinu zaista je ohrabrujuće što je načelnik elaborirao ovdje nama i daj Bože da ovo ostane ovako do kraja i ovo bi bilo idealno u ovo vrijeme pandemije.

Prisustvovao sam od početka ove sjednice nizu nelogičnosti i želim kroz ovo pitanje da se toga dotaknem, a to je, molim vas predsjedavajuća i dopredsjedavajući da, kada vodite sjednicu OV-a, vodite računa o Poslovniku o radu OV-a Ilijaš i kad kažete vijećniku da nema pravo na repliku, onda treba da mu kažete po kojoj tački, kojoj alineji Poslovnika nema pravo na repliku. Do sada to nije bio slučaj nikada. Dakle, meni da ste rekli da nemam pravo na repliku ja bih vam ovo sve tražio i sačekao bih da sekretar nađe taj član gdje piše da ja nemam pravo na repliku. To nije istina i nemojte se u to upuštati bar kad sam ja u pitanju i nemojte se u to upuštati i govoriti mi da ja to nemam pravo ako je to propisano Poslovnikom.

Što se tiče Prijedloga Izmjena i dopuna Budžeta Općine Ilijaš za 2020. godinu, već sam rekao da je ovo za sve nas ohrabrujuće, međutim, 9% je manji Budžet, a načelnik je naveo da su prihodi znatno umanjeni kada se tiče općinskog budžeta i ne znam kakav će rebalans biti i hoće li taj budžet na kraju godine biti manji ili znatno smanjen.

ALAN ŠERAK - vijećnik SDP-a

Ja ne znam da li Načelnik Općine Ilijaš i sam vjeruje u ovo što je nama predočio imajući u vidu da ovaj rebalansirani Budžet, odnosno Rebalans koji mi danas treba da potvrdimo, se ne razlikuje mnogo u odnosu na Prijedlog Budžeta koji smo nekada davno izglasali. Strukturalno se neću baviti Budžetom, s tim da smatram ako smo već imali dobru namjeru, a ja isto tada bio na fonu zajedno sa vama da trebamo čekati sa rebalansom Budžeta da ne radimo ono što su mnoge lokalne zajednice u ovoj državi uradile kada je pandemija zvanično bila proglašena u BiH, jer su odmah krenuli u rebalans svojih budžeta, a ja sam smatramo da trebamo sačekati i vidjeti ekonomska kretanja u državi i kako će se to odraziti na pad javnih prihoda koji su evidentni. Prema zadnjim informacijama na dnevnom nivou priliv u Budžet je manji, u većem iznosu od 50% nego što je to bilo u prethodnom periodu, odnosno u istom ovom periodu prethodnih godina. I sada dolazimo sa ovako bombastičnim Budžetom od skoro 15.000.000,00 KM gdje smatramo da ćemo mi neke stvari kao moći uraditi. Lično smatram da ovaj iznos ćemo teško ostvariti uz najbolje namjere koje svi mi ovdje imamo. Izlazite i onda govorite da ćemo teško ostvariti, ovo, teško ostvariti ono, a planirali ste Budžetom da ćete to uraditi. To je onda vaš poraz. Dakle, u startu "srljate" u deficit. Ja to tako ne bih radio. Jasno je da ćemo imati još jedan rebalans Budžeta nekada krajem godine, a vjerovatno iza izbora, jer ovo po meni, ne odražava pravu sliku stanja trenutno na terenu kakvo imamo. Znamo da je ekonomska aktivnost pala drastično, koja je ujedno generator svih prihoda, koji svi organi uprave u ovoj državi imaju. Nedavno je rečeno da je prihod Kantona Sarajevo manji za milion maraka na dnevnoj bazi. Imamo tamo neke neodgovorne ministre, koji potpisuju sporazume i obavezuju se da će nešto isplatiti, a sami ne znaju kako i na koji način će obezbjediti taj novac. Po meni, ovo je bacanje prašine u oči građanima. Podržat ćemo mi ovaj rebalans, nije to nikakav problem, ali isto tako smatram da je on trebao biti dosta realniji u odnosu na ono što ste vi danas nama ovdje ponudili. Iznos od 14 miliona i nešto, mi nećemo ostvariti na kraju godine. Da je to cca 11 miliona, ja bih rekao OK, to je to, u skladu sa kretanjima koja trenutno imamo. Trebaće godina i godina da nam se ekonomija "zahukta" nažalost, jer to su bili jaki poremećaji za neše privrednike da se to ne može preko noći tako lako riješiti.

Volio bih da mi odgovorite šta vi smatrate za ovaj ponuđeni rebalans Budžeta i šta je u konačnici vaša realna pretpostavka koji će to iznos biti na kraju godine?

AKIF FAZLIĆ - općinski načelnik

Prije svega, hvala na ovoj vrsti diskusije, sigurno najvažnija za rebalans. Manje je važno je li negdje 100.000,00 KM više ili manje. Najvažnije je da li je Budžet realan, je li ostvariv, je li provodiv kako će se realizirati i evo zbog toga iskazujem zadovoljstvo da prodiskutujemo o tome. Dakle, ja ću odmah eksplicite, kao što sam obrazlagao izmjene i dopune, 14.200.000,00 KM je to u Budžetu, nije 15.000.000,00 KM i odmah sam rekao da je on blizu milion iznad realnih očekivanja. To znači da je taj milion neka naša ambicija i ja stojim iza ovog Budžeta, ovo je Prijedlog, ali kada pričamo o tome, pričamo s aspekta realnosti da je ta cifra cca 13.200.000,00-13.300.000,00 KM koja će se potpisati da će se završiti. Često mi iskazujemo sumnje, a pogotovo kada je Budžet u pitanju. Iskazivali smo to i prošle i prethodne godine, pa smo prošle godine došli do 18.000.000,00 KM. Dakle, ne izlazimo mi zaista s dokumentima koji su na nekim toliko labavim postoljima. Izlazi se s objektivnim prijedlozima. Ono što je naša obaveza jeste da sve projekcije koje dobijemo kada su porezni prihodi u pitanju, a koje je u okviru Federalnog Ministarstva finansija, da je to obaveza da te cifre upišemo i zbog toga mi smo upisali ovaj PDV koji je možda i ta

projekcija malo preambiciozna ili nije, vidjet ćemo, ali s tog aspekta je uključena. Još samo jedna stvar oko realnosti Budžeta i koliko i šta možemo očekivati do Nove Godine - dakle, on je koncipiran na postojećoj epidemiološkoj, prognozerskoj situaciji kada je u pitanju Korona virus i kada su u pitanju mjere koje će se eventualno donositi. Opredjeljenje svih, ne samo u Federaciji BiH, sigurno i u regionu, pa i drugih država je da se neće više nikada onako restriktivne mjere uvesti koje će značiti blokiranje ekonomskih i svakih drugih aktivnosti. Naravno, pogoršanje će biti nešto što će opet dodatno uticati. Dakle, ovdje je poseban problem i poseban problem oporavka je u turizmu i to je nešto što Kanton Sarajevo itekako s aspekta stvaranja prihoda i na društveni bruto proizvod itekako utiče i tu se može što se kaže ako se to pojavi, onda nema do kraja godine iz tog izvora praktično ništa. Ali evo po stavkama - koncesione naknade, Ugovor o koncesijama je bio pripremljen i za prethodnu Vladu KS u januaru i taj Ugovor još uvijek stoji u Ministarstvu privrede KS i po tom Ugovoru jednokratna koncesiona naknada je cca 560.000,00 KM od čega općini pripada 60% i mi smo to upisali u osnovni Ugovor. Obzirom da taj Ugovor još niko ne pokreće, a ne znam sada i pitanje investitora da li će u ovom momentu ići na potpisivanje koncesionog Ugovora u smislu realnosti. Dakle, mi smo tu stavku isključili iz prihodovne strane Budžeta. Pitanje MMF-a - po Protokolu sa MMF-om općine nisu uključene u raspodjelu sredstava MMF-a, ali kroz Rebalans Budžeta Federacije BiH pozicionirana je stavka od 30.000.000,00 KM. Vi znate da je bila i stavka od 21.000.000,00 KM za općine i kantone i kako je neslavno ta Odluka završila i dobro je da je stavljena van snage. Dakle, kroz ovu poziciju, prijedlozi prema Vladi su da se podjeli isti iznos za sve općine. Ja sam imao stav da se naprave tri grupe općina gdje bi se podijelilo u nekim ne velikim rasponima iznosi po tim grupama općina, ali po svim projekcijama u toj raspodjeli, evo mi smo stavili 375.000,000 KM kao prihod. Dakle, Budžet u trenutnim epidemiološkim uslovima je realan, a ako se oni promjene naravno da će to izazvati i dodatnu vrstu nerealnosti. Garancija ovom Budžetu jesu i sporazumi koje smo mi potpisali. Potpisali smo sa Ministarstvom saobraćaja KS, Ministarstvom komunalne privrede KS, sa Ministarstvom privrede KS, a ostaje još da se potpiše sa Ministarstvom kulture i sporta za II fazu gradskog stadiona i ta sredstva Vlada KS 4,2 miliona za objekte iz sporta pozicionirali u ovom rebalansu kao kredit od Razvojne banke koja će Kanton vraćati i gdje sad očekujemo raspored tih sredstava i nadam se da ćemo u narednih petnaest dana doći i do tog sporazuma. Naše je da realiziramo, da stvorimo obaveze, da se naprave fakture na osnovu kojih ćemo povlačiti sredstva i mi smo u većini tih procedura ili završnoj ili nekoj srednjoj fazi provođenja tenderskih procedura.

ALAN ŠERAK - vijećnik SDP-a

Dakle načelnice, ovaj dokument će vam "visiti nad glavom" i to da vam bude jasno. Ja ću biti taj prvi koji će vas pratiti vezano za realizaciju. Sve što bude trebalo stojim na raspolaganju, ali i sada smatram da ćete vi ovo teško realizovati. Rekli ste da je realan, pa vidjet ćemo na kraju godine da li je bio realan. Zamolit ću vas da mi objasnite kapitalni transfer neprofitnim organizacijama ekonomski kod 615311 - škole, objekti, oprema gdje je došlo do povećanja od 62.000,00 KM. Ako možete da mi pojasnite na šta će se 837.000,00 KM utrošiti po pitanju škola i oprema, a druga stvar, da li je to u skladu sa Operativnim planom načelnika koji smo usvojili početkom ove godine?

AKIF FAZLIĆ - općinski načelnik

Ova pozicija je već realizirana u najvećoj mjeri.

Utopljanje područne škole Dragoradi i energetska efikasnost 80.000,00 KM,

obezbijedena sredstva, projekat u fazi izrade projektne dokumentacije i poslije toga raspisivanje tendera za utopljanje ovog objekta. Dakle, na računu postoje namjenska sredstva 80.000,00 KM Dragoradi.

Adaptacija i opremanje sprata na objektu Vrtić Ilijaš 80.000,00 KM, obezbijedena namjenska sredstva na našem računu stoje i 10.000,00 KM koje ćemo mi dodatno obezbijediti što iznosi 90.000,00 KM, da se opremi gonji sprat u vrtiću. Urađena potrebna dokumentacija i akt je u Odsjeku za javne nabavke i ovih dana će biti objavljen ili je već objavljen.

Rekonstrukcija i redizajn fiskulturne sale u OŠ "Hašim Spahić" i redizajn stare fiskulturne sale, ovo je produženi boravak, 195.000,00 KM, projekat završen, objekat je u fazi tehničkog prijema i on će se ovih dana tehnički primiti i staviti tačka na to.

Nabavka opreme za produženi boravak, dakle za ovako adaptiran prostor, kuhinjska oprema, oprema za učionice, jedan tender bio i nije uspio, drugi raspisan i u toku je.

Sufinansiranje projekata OŠ "Stari Ilijaš" 15.000,00 KM - mi smo ovu Odluku potpisali davno o transferu na ovu školu i radi se o 4-5 manjih projekata koje je škola izabrala kao za nju najvažniji.

Sufinansiranje SŠC "Nedžad Ibrišimović" Ilijaš 30.000,00 KM, tu ima puno zahtjeva što tamo treba raditi, a po meni, ključni zahtjev je opremanje dvije nove prostorije koje služe za učeničke radionice i to će biti transfer prema SŠC-u da to opreme.

Sanacija sanitarnih čvorova u OŠ "Podlugovi" 30.000,00 KM, ali nažalost, ovaj projekat je puno skuplji i zahtjevniji i prema predmjerima možda i cca 100.000,00 KM. Mi smo obezbjedili 30.000,00 KM kroz sve ove preraspodjele i uradit ćemo sanitarne čvorove vjerovatno na gornjem spratu.

Pristupna rampa za osobe sa invaliditetom u OŠ "Hašim Spahić" 7.000,00 KM i mislim da je to već transferisano ovoj osnovnoj školi da se uradi pristupna rampa.

Završetak projekta izgradnje fiskulturne sale u SŠC "Nedžad Ibrišimović", znate da smo je stavili u funkciju za Dan općine Ilijaš, da je u januaru i februaru bilo dosta intenzivnih radova tako da je 130.000,00 KM već realizirano, sala je puštena i također nabavka opreme za tu salu 150.000,00 KM što znači da je opremljena i za objekat te škole uređenje mokrih čvorova, svlačionica, onih starih, gdje smo pred otvaranje sale izvršili potpunu sanaciju tih prostora 40.000,00 KM. Dakle, ovih 320.000,00 KM je već realizirano i ovih 195.000,00 KM kada je u pitanju produženi boravak, a ostali su u fazi tenderske dokumentacije ili pripreme za tendersku dokumentaciju.

ALAN ŠERAK - vijećnik SDP-a

Još jedno potpitanje. Dakle, Vlada Kantona Sarajevo je nama transferisala taj novac, a mi ćemo biti implementatori tih projekata.

AKIF FAZLIĆ - općinski načelnik

Dragoradi-Vlada KS; vrtić-Vlada KS; OŠ "Hašim Spahić" 195.000,00 KM (150.000,00 KM Vlada KS, 45.000,00 KM općina); oprema za produženi boravak OŠ "Hašim Spahić" 70.000,00 KM Vlada KS; OŠ "Stari Ilijaš" općina; SŠC "Nedžad Ibrišimović" 30.000,00 KM općina; OŠ "Podlugovi" 30.000,00 KM općina; OŠ "Hašim Spahić" 7.000,00 KM općina; završetak fiskulturne sale općina je cca 250.000,00 KM, a 500.000,00 KM plus 150.000,00 KM za opremu je dao Kanton i ovih 40.000,00 KM je dala općina za svlačionice.

Diskutanata po ovoj tački dnevnog reda više nije bilo, pa je OV-e, uz amandmane koji su su sastavni dio Prijedloga Izmjena i dopuna Budžeta Općine Ilijaš za 2020. godinu,

jednoglasno donijelo

Izmjene i dopuna Budžeta Općine Ilijaš za 2020. godinu

AD-4

Prijedlog Odluka o:

- a) usvajanju Regulacionog plana "Apartmansko naselje Mrakovo 1" - Ilijaš
- b) provođenju Regulacionog plana "Apartmansko naselje Mrakovo 1" - Ilijaš

MELIHA AVDIBEGOVIĆ - pomoćnik načelnika

Ovdje se radi o lokalitetu i Regulacionom planu za koji je provedena, potpuno Zakonom, propisana procedura. Imali smo javni uvidu ovaj Nacrt plana u trajanju od 15 dana i javnu raspravu na kojoj nije bilo primjedbi. Prisustvovao je predsjednik Savjeta MZ Mrakovo, vijećnica i predstavnici Zavoda i primjedbe su se odnosile na samu realizaciju ako i kada se i Plan usvoji. Lokalitet je površine 1,2 ha, planirani su individualni stambeni objekti - 16 individualnih stambenih objekata, 16 parcela i 1 saobraćajnica unutar samog obuhvata ovog Plana. Kroz Plan dostavljene su sve faze za usvajanje, od vodosnadbijevanja, odvođenja fekalnih i oborinskih voda, elektroosnadbijevanja i toplifikacije. Komisije nisu imale primjedbi na Plan, osim jedne gramatičke greške koju ćemo ispraviti.

MEHO DŽINDO - samostalni vijećnik

Jesu li to Haluge?

MELIHA AVDIBEGOVIĆ - pomoćnik načelnika

Nisu Haluge. Donijeli smo mi Regulacioni plan "Savića Brdo" i imamo "Savića Brdo 1" i to je malo niže između ta dva Regulacionia plana.

ALMIR ŠPIODIĆ - samostalni vijećnik

Kada su u pitanju Regulacioni planovi, ja sam uvijek bio rezervisan, a pogotovo u dijelu kada ne znam o čemu se konkretno radi. U tekstualnom dijelu sam pročitao "stabilnost terena". Ne znam ko je radio i donio ocjenu da je teren nestabilan za gradnju i da se ne preporučuje gradnja. Tako piše u ovom dokumentu i sada mi trebamo usvojiti nešto ako nam struka kaže da je teren nestabilan, ne znam da ovo nije možda greška. Volio bih da mi se ovo pojasni.

MELIHA AVDIBEGOVIĆ - pomoćnik načelnika

Nije greška. Teren jeste takav. Urađen je geomehanički nalaz terena. Međutim, kroz cijelu Odluku, preporuke, Plan je donešen, ali za realizaciju projekta potrebno je da se urade detaljna istraživanja za svaku lokaciju i sanirati teren po potrebi. Znači, da li će se sanacija terena prvo izvršiti, pa će se onda graditi kuće ili će se sanacija terena izvršiti uporedo sa izgradnjom ovih objekata i saobraćajnice. Znači, detaljni istražni radovi moraju biti i to će Služba usloviti za svaki objekat koji se bude gradio na tom lokalitetu.

Diskutanata po ovoj tački dnevnog reda više nije bilo, pa je OV-e većinom glasova donijelo

Odluku o:

- a) usvajanju Regulacionog plana "Apartmansko naselje Mrakovo 1" - Ilijaš
- b) provođenju Regulacionog plana "Apartmansko naselje Mrakovo 1" - Ilijaš

AD-5

Prijedlog Odluke o pristupanju izradi Regulacionog plana "Apartmansko naselje Paljevo" Gornji Malešići

MELIHA AVDIBEGOVIĆ - pomoćnik načelnika

Obzirom da se ovo dugo radi od 2018. godine i smjernice su došle pred samo održavanje ove sjednice i bio je pripremljen Prijedlog ove Odluke i ima određenih gramatičkih grešaka koje ćemo ispraviti, a želim samo dodati jedan novi član, jer sam u međuvremenu vidjela da nismo dodali vremenski period trajanja Plana, tako da će u članu 3. biti navedeno da Plan važi do usvajanja novog Plana. Znači, on važi dok se ne donese drugi Plan.

Diskutanata po ovoj tački dnevnog reda više nije bilo, pa je OV-e, uz navedeni prijedlog da se doda član 3., većinom glasova donijelo

Odluku o pristupanju izradi Regulacionog plana "Apartmansko naselje Paljevo" Gornji Malešići

AD-6

Prijedlog Odluke o usvajanju "Lokalnog akcionog plana za djecu Općine Ilijaš za period 2020-2022. godina"

SANJA ZAGORAC-JOZIĆ - pomoćnik načelnika

Komisija za statut i propise nije imala primedbi na pravni osnov i pravno-tehničku usklađenost ove Odluke. Ovdje je koordinatorica radne grupe koja je radila na samoj izradi ovog akcionog plana, pa o samoj metodologiji izrade plana moći ćete kolegici Enisi Mešetović postavljati pitanja.

Općina Ilijaš je prije dvije godine potpisala Sporazum sa međunarodnom organizacijom WORLD VISION u cilju jačanja i koordinacije referalnih mehanizama za zaštitu prava djeteta na lokalnom nivou. Kao plod te naše saradnje je desetogodišnji sporazum i urađen i ovaj Lokalni akcioni plan za djecu općine Ilijaš za naznačeni period s tim da se uključe sve strukture koje se bave pitanjima djece kako bi naše djevojčice i dječaci do 18 godina starosti bili što sigurniji na lokanom nivou naravno uz materijalnu i finansijsku podršku same međunarodne organizacije WORLD VISION, a i drugih donatora. U tom pravcu formirana je jedna multisektoralna grupa čiji predstavnici su bili iz svih osnovnih škola na području općine Ilijaš, iz srednjih škola, a također i Službe za društvene djelatnosti i poslove mjesnih zajednica, PU Ilijaš, Centra za socijalni rad i DZ Ilijaš. Utvrđen je akcioni plan i mogu reći do sada je Općina Ilijaš većinu ovih aktivnosti provodila, ali prvi put imamo priliku očitovati se o jednom ovakvom dokumentu koji će, nadam se, pomoći da mi budemo implementatori i međunarodnih konvencija o pravima djeteta i dva Protokola potpisana i odnose se na sigurnost najmlađe populacije na području naše općine. Ako bude bilo potrebe, kolegica Enisa će više reći oko izrade Plana. Ova radna grupa će pratiti implementaciju Plana i najmanje jedanput godišnje izvještavati Općinsko vijeće o implementaciji Plana.

ALAN ŠERAK - vijećnik SDP-a

Mene zanima ko je odredio predstavnika Općinskog vijeća u ovu radnu grupu koja je radila na izradi ovog Plana?

ALMA OMEROVIĆ - predsjedavajuća

Predstavnika Općinskog vijeća u ovu radnu grupu je odredio Kolegij Općinskog vijeća.

ALAN ŠERAK - vijećnik SDP-a

Zamoliti ću da mi se dostavi ta Odluka i da li Kolegij ima mandat da odredi člana u ovu radnu grupu ili Općinsko vijeće.

ALMIR ŠPIODIĆ - samostalni vijećnik

Ja bih da pohvalim ovaj akcioni plan kada se tiče omladine i djece. Posebno mi se svidio način analize koji ste uradili, jer bez dobre analize mi ne možemo napraviti dobar Plan. Ono što je moja zamjerka ovdje je da mislim da ste trebali uključiti i predstavnike Vijeća roditelja, jer ipak se radi o djeci i znamo koliko su roditelji vezani za djecu. Oni najbolje poznaju svoju djecu i mislim da bi vam dali neke korisne informacije i pomogli u izradi ovog Plana.

ENISA MEŠETOVIĆ - stručni saradnik za obrazovanje, pitanje mladih i NVO sektor

Želim odgovoriti vijećniku Almiru da je bilo uključeno Vijeće roditelja preko škola budući da smo anketiranje radili sa učenicima, roditeljima i nastavnicima, odnosno škole koje su radile po svojim oblastima tako da je u tom smislu bilo prepušteno školama da sarađuju sa njima, a mi, kao općina, smo koordinirali čitav proces kao nosioci aktivnosti.

Za kolegu Alana, ja ću sada otići i donijeti Odluku u kojoj piše da je izabrana vijećnica Šeherzada Ćosić kao član radne grupe ispred Općinskog vijeća.

ALAN ŠERAK - vijećnik SDP-a

Kolegij OV-a je tu malo izašao iz okvira svojih nadležnosti. Vijeće je to koje treba da donese tu Odluku. Sa druge strane, postavlja se pitanje čemu nam služi Komisija za mlade - stručno tijelo imenovano od strane ovog Općinskog vijeća koje treba da se bavi upravo tim pitanjima. Plan je dobar i vama svakako čestitam, ali ubuduće vodite računa da mi imamo svoja radna tijela koja su usko vezana za tu problematiku i koja treba da se bave tim pitanjima. Znači, kada drugi put budete nešto ovako radili, angažujte ovu Komisiju, a ne nekoga ko treba da predstavlja Vijeće, a Vijeće o tome nije donijelo Odluku.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o usvajanju "Lokalnog akcionog plana za djecu Općine Ilijaš za period 2020-2022. godina"

AD-7

Prijedlog Odluke o stavljanju van snage Odluke o pristupanju izradi Izmjena i dopuna Regulacionog plana "Željezara" Ilijaš - izgradnja objekta za izradu lakih metalnih konstrukcija

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o stavljanju van snage Odluke o pristupanju izradi Izmjena i dopuna Regulacionog plana "Željezara" Ilijaš - izgradnja objekta za izradu lakih metalnih konstrukcija

AD-8

Prijedlog Odluke o načinu i uslovima prodaje neizgrađenog građevinskog zemljišta (k.č.br.50/2 "Banovac")

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o načinu i uslovima prodaje neizgrađenog građevinskog zemljišta (k.č.br.50/2 "Banovac")

AD-9

Prijedlog rješenja iz imovinsko-pravne oblasti, kojima se utvrđuje javni interes:

- a) broj:06/1-27-585/20
- b) broj:06/1-27-795/20
- c) broj:06/1-27-961/20
- d) broj:06/1-27-1134/20
- e) obezbjeđenje zemljišta za potrebe rekonstrukcije i proširenje lokalnog puta na relaciji Ljubnići-Kadarići.

Diskutanata po ovoj tački dnevnog reda nije bilo, pa je OV-e jednoglasno donijelo

Rješenja iz imovinsko-pravne oblasti, kojima se utvrđuje javni interes:

- a) broj:06/1-27-585/20
- b) broj:06/1-27-795/20
- c) broj:06/1-27-961/20
- d) broj:06/1-27-1134/20
- e) obezbjeđenje zemljišta za potrebe rekonstrukcije i proširenje lokalnog puta na relaciji Ljubnići-Kadarići.

Nakon što je iscrpljen dnevni red, predsjedavajuća Alma Omerović zaključila je četrdesettreću sjednicu OV-a Ilijaš u 11:40 h.

Zapisničar:
Maida Habibović

PREDSJEDAVAJUĆA
OPĆINSKOG VIJEĆA ILIJAŠ
Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20794Q

